

आकाशवाणी जयपुर-अजमेर

प्रादेशिक समाचार

- प्रदेश रा सात विधानसभा हलकां मांय उप-चुनाव सारू काल संवारे सात ऊं सिंज्या छह बज्यां ताई वोट पड़ेला- सगळी तैयारियां पूरी।
- राइजिंग राजस्थान ग्लोबल इन्वेस्टमेंट समिट रा तैत आज जयपुर मांय आईटी अर स्टार्टअप्स रा प्री-समिट मांय 6 हजार करोड़ रुपया ऊं बत्ती रकम रा करार करी ज्या।
- जयपुर डिस्कॉम पीएम सूर्यघर मुफ्त बिजली योजना रा तैत घरां री छतां माथे सूरज री रोशनी ऊं बिजली बणावण री मशीनां लगावण सारू एसओपी जारी कीनी।
- प्रदेश मांय आज देव उठनी ग्यारस रे मौके खास धार्मिक कार्यक्रम-अबूझ सावा रे कारण शादी-ब्याह री धूम।

000

प्रदेश री 7 विधानसभा सीटां माथे उप-चुनाव सारू काल संवारे 7 ऊं सिंज्यां 6 बज्यां ताई वोट पड़ेला। ई सारू सगळी जरूरी तैयारियां पूरी व्हे गयी है। मुख्य निर्वाचन अधिकारी नवीन महाजन आज प्रशासन अर पुलिस रा अहलकारां सागे मीटिंग कर र सरहदी हलकां मांय खास सावचेती राखण समेत जरूरी हुकम दीना। आज आखिरी दौर री सिखावण पाछे मतदान दल रवाना व्ह्या। दौसा, रामगढ़, झुंझुनूं, देवली-उनियारा, खींवसर, सलूंबर अर चौरासी विधानसभा हलकां मांय व्हेवण वाळा उप-चुनाव सारू 1 हजार 915 मतदान केन्द्र बणायी ज्या है, ज्यां माथे 19 लाख 36 हजार ऊं बत्ता मतदाता वोट दे सकेला। 1 हजार 170 मतदान केन्द्रां माथे वोट देवण रा काम री लाइव वेबकास्टिंग करी जावेला। स्वतंत्र, निपख अर बिना डर चुनाव प्रक्रिया पूरी करावण सारू 9 हजार ऊं बत्ता सुरक्षा कर्मचारी तैनात करी ज्या है। नागौर रा जिला निर्वाचन अधिकारी अरुण कुमार पुरोहित बतायो के खींवसर निर्वाचन क्षेत्र मांय बणायी ज्या 268 मतदान केन्द्रां सारू राजकीय विधि महाविद्यालय ऊं पोलिंग पार्टियां ने रवाना करीजी। टोंक जिला रा देवली-उनियारा विधानसभा हलका मांय व्हेवण वाळा मतदान सारू राजकीय स्नातकोत्तर महाविद्यालय ऊं मतदान दल रवाना व्ह्या। डूंगरपुर रा चौरासी विधानसभा हलका मांय उप-चुनाव सारू भोगीलाल पंड्या राजकीय महाविद्यालय ऊं मतदान दल रवाना करी ज्या। जिला कलेक्टर अंकित कुमार सिंह चौरासी विधानसभा हलका रा मतदातावां ऊं बत्ती ऊं बत्ती तादाद मांय वोट देवण सारू जावण री अपील कीनी है।

000

जयपुर मांय राख्यी ज्या 'राइजिंग राजस्थान' ग्लोबल इन्वेस्टमेंट समिट ऊं पैली रा निवेशक सम्मेलन मांय 43 कंपनियां सागे 6 हजार करोड़ रुपया ऊं बत्ती रकम रा निवेश ऊं जुड़्या न्यारा-न्यारा करार माथे सही करीजी। ई मौके सूचना प्रौद्योगिकी अर संचार मंत्री कर्नल राज्यवर्धन राठौड़ कह्यो के निवेश सारू राजस्थान देश रो सब ऊं अनुकूल राज्य है। वे कह्यो के राज्य सरकार राइजिंग राजस्थान ग्लोबल इन्वेस्टमेंट समिट रे जरिये कंपनियां सागे करार कर र राज्य रो विकास तैय कर्यो जावेला। प्री-समिट मांय प्रसार भारती रा मुख्य कार्यकारी अधिकारी गौरव द्विवेदी कह्यो के सूचना अर प्रसारण मंत्रालय री

ओर ऊं देश मांय बेगा ई सिनेमा, गेमिंग, एन्टरटेन्मेंट अर एनीमेशन रा हलका मांय संभावनावां ने ध्यान राखता थकां एक्सीलेंस सेंटर खोल्यो जावेला।
वे कह्यो के सरकार ई हलका सारू खास नीति बनावण माथे ई काम कर रही है, जिण ऊं आवता बगत मांय कन्टेंट क्रिएटर्स ने बधावो मिलेला। ई मौके डिजिटल राजस्थान यात्रा ने झंडी बता र रवाना करीजी अर 145 स्टार्टअप कम्पनियां ने 5 करोड़ 65 लाख रुपया रा चैक दिया ज्या।

000

देश मांय शुद्ध प्रत्यक्ष कर संग्रह चालू माली साल मांय 12 लाख 10 हजार करोड़ रुपया ऊं बत्तो व्हे ग्यो है। केंद्रीय प्रत्यक्ष कर बोर्ड ऊं मिली जाणकारी रे मुजब ई साल एक अप्रैल ऊं 10 नवंबर बीचे रिफंड रा समायोजन ऊं पैली सकल प्रत्यक्ष कर संग्रह 21 दशमलव दो फीसदी बध र 15 लाख करोड़ रुपया ऊं बत्तो व्हे ग्यो। ई दौरान दो लाख 91 हजार करोड़ रुपया रा रिफंड जारी करी ज्या, जो लारला साल री तुलना मांय 53 फीसदी बत्तो है। केंद्रीय प्रत्यक्ष कर बोर्ड रे मुजब कॉर्पोरेट टैक्स संग्रह मांय ई पांच लाख 10 हजार करोड़ रुपया सागे मामूली बधोतरी व्ही, जो लारला साल रा चार लाख 79 हजार करोड़ रुपया री तुलना मांय बत्ती है।

000

केंद्रीय शिक्षा मंत्री धर्मेन्द्र प्रधान कह्यो है के तालीम साल 2047 ताई विकसित देश बणबा रो एकलो जरियो है। वे आज नई दिल्ली मांय आला दर्जा री अर तकनीकी शिक्षा रा बारा मांय राख्यी ज्यी कार्यशाला मांय बोल रह्या हा। श्री प्रधान शिक्षा रा हलका मांय बुनियादी ढांचा, नेतृत्व, पाठ्यक्रम, बहु-विषयक अनुसंधान माथे खास ध्यान देवण बाबत कह्यो। केंद्रीय शिक्षा मंत्री कह्यो के खेल, वाद-विवाद, कविता, नाटक अर गेमिंग सरीखा विषयां माथे राष्ट्रीय शिक्षा नीति रा तैत पेशेवर कोर्स बणाया जा रह्या है। वे मायड़ भाषा मांय शिक्षा देवण रा महत्त्व माथे ई जोर दीनो।

000

जयपुर डिस्कॉम पीएम सूर्यघर मुफ्त बिजली योजना रा तैत घरां री छत माथे सूरज री रोशनी ऊं बिजली बनावण री मशीनां लगावण रो काम और तेज करण अर आसान बनावण सारू मानक संचालन प्रक्रिया-एसओपी जारी कीनी है। ई रा तैत अर्जी देवण वाळां सारू जरूरी प्रक्रिया ने छोटी करण सागे ई डिस्कॉम स्तर माथे कर्या जावण वाळा काम ऑनलाइन करण री व्यवस्था है, जिण ऊं लोड बधावण, मीटर री जांच करावण अर साइट वेरीफिकेशन सरीखा काम सारू डिस्कॉम रा दफ्तर जावण अर न्यारी-न्यारी फाइलां लगावण री जरूरत नी रेहवेला। डिस्कॉम चेयरमैन अर जयपुर विद्युत वितरण निगम री प्रबंध निदेशक आरती डोगरा आ जाणकारी दीनी। वे बतायो के डिस्कॉम रा एनसीएमएस मॉड्यूल रे जरिए पीएम सूर्यघर योजना रा तैत अर्जी देवण वाळां रा 10 किलोवाट भार ऊं जुड़्या कनेक्शन ऑनलाइन जारी कर्या जा सकेला। वे बतायो के पीएम सूर्यघर योजना रा तैत प्रदेश मांय हाल ताई साढे 16 हजार घरां मांय सूरज री रोशनी ऊं बिजली बनावण री मशीनां लगा दीरीजी है।

000

ऊर्जा मंत्री हीरालाल नागर भरतपुर जिला रा बयाना मांय जनसुणवाई कीनी। ई मौके वे अहलकारां ने बजट मांय करी ज्या ऐलाण रे मुजब काम बेगा पूरा करण रा हुकम दीना। मंत्री बिजली विभाग रा अधिशाषी अभियंता ने सूपा गांव मांय 132 केवी अर निभेरा मांय 220 केवी सब स्टेशन बनावण रा काम री जाणकारी ई लीनी अर जरूरी हुकम दीना।

000

आज लोक सेवा प्रसारण दिवस मनायी ज्यो। साल 1947 मांय दिल्ली रा आकाशवाणी स्टूडियो मांय राष्ट्रपिता महात्मा गांधी रे पधारण री याद मांय हर साल ओ दिन मणायो जावे है। महात्मा गांधी देश रा बंटवारा पाछे पाकिस्तान ऊं आ र हरियाणा रा कुरुक्षेत्र मांय अस्थायी तौर ऊं बस्या लोगां ने संबोधित कीना हा।

000

आज देवउठनी ग्यारस रे मौके मांगलिक काम ओजू सरू व्हे ग्या। ई मौके केई ठौड़ां तुलसी शालिग्राम रो पूजन ई करी ज्यो। अबूझ मुहुर्त व्हेवण रे कारण आज मोटी तादाद मांय जोड़ां रा ब्याह व्हे रह्या है। पाली, भीलवाड़ा, केकड़ी, शाहपुरा, जैसलमेर अर सवाईमाधोपुर समेत केई ठोड़ां मिन्दरां मांय न्यारा-न्यारा आयोजन व्हे रह्या है। करौली रा अंजनी माता मिन्दर मांय ई मोटी तादाद मांय जातरू पूग रह्या है। ई मौके करौली मांय जिला कलेक्टर छुट्टी रो ऐलाण कीनो है। ब्रज हलका रा भरतपुर मांय ई देव उठनी ग्यारस रे मौके जातरू पवित्र स्नान कर र सुख-समृद्धि री कामना कीनी। बांसवाड़ा रा त्रिपुर सुंदरी मिन्दर

मांय आज प्राकट्योत्सव मनायी ज्यो, जदके सीकर जिला रा खाटूश्याम जी मिन्दर मांय ई मोटी तादाद मांय जातरू पूग रह्या है। सवाईमाधोपुर, पाली अर कोटा मांय ई खाटूश्याम रो जन्मोत्सव मनायी ज्यो। पाली रा राधाकृष्ण मिन्दर अर कोटा रा मथुराधीश मिन्दर मांय खास धार्मिक आयोजन राख्यी ज्या। भरतपुर रा बांकेबिहारी मिन्दर मांय झांकी सजाई ज्यी। घरां मांय महिलावां मंगल गीत गाया। ई सागे ई कने रा गोवर्धन धाम मांय जातरू गिरिराज जी री सात कोस री परिक्रमा कीनी। डीग जिला रा कामां मांय तीर्थराज विमल कुंड माथे सवा लाख दीयां ऊं सजावट करी ज्यी। झालावाड़ रा चंद्रमौलेश्वर मिन्दर मांय भजन—कीर्तन रा अर दूजा आयोजन राख्यी ज्या। जैसलमेर रा रुणिचा कुआं माथे हवन, यज्ञ अर दूजा धार्मिक अनुष्ठान राख्यी ज्या। दूजी कानी नामी पुष्कर मेळा मांय आज देवस्थान अर पर्यटन विभाग री ओर ऊं आध्यात्मिक यात्रा निकाळी ज्यी, जिण रो खादिमां री संस्था अंजुमन री ओर ऊं स्वागत करी ज्यो। पुष्कर मांय आज पंच तीर्थ स्नान सरू व्ह्यो। जातरूआं रा सुबीता सारू अजमेर—पुष्कर बीचे तीन खास रेलगाड़ियां चलाई जा रही है।

000

झालावाड़ जिला रा झालरापाटन मांय आज राज्य स्तर रो चन्द्रभागा पशु मेळो सरू व्ह्यो। चंद्रभागा नदी रे किनारे लागण वाळो ओ मेळो 20 नवम्बर ताई चालेला। मेळा मांय पर्यटन विभाग री ओर ऊं 14 नवंबर ऊं न्यारा—न्यारा आयोजन कर्या जावेला।

000

राज्य सरकार पशुपालकां रा घर पहुंच र सेवा देवण वाळी 1962 मोबाइल वैटरनरी यूनिट्स अर बीएफआईएल रा कॉल सेंटर ने आवता 6 महीना सारू अत्यावश्यक सेवा व्हेवण रो ऐलाण कीनो है। गृह विभाग री संयुक्त शासन सचिव पूजा पार्थ बतायो के पशुपालकां ने हड़ताल रे कारण व्हेवण वाळी परेशानी ऊं बचावण सारू अति आवश्यक सेवाएं अनुरक्षण अधिनियम 1970 रा तैत आं सेवावां मांय हड़ताल माथे रोक लगायी ज्यी है।

000

सांचौर जिला मांय ग्राम पंचायतां रा पंजीकरण सारू बेगो ई सर्वे करायो जावेला। जिला कलेक्टर शक्ति सिंह राठौड़ री सदरत मांय आज राख्यी ज्यी जिला विकास समिति री मीटिंग मांय आ जाणकारी दीरीजी। मीटिंग मांय बतायी ज्यो के जिला रा बागोड़ा रा बिजलिया मांय नुवी ग्राम सेवा सहकारी समिति बणावण रो प्रस्ताव प्रशासन ने भेजी ज्यो है। जिला मांय हाल ताई 146 मांय ऊं 111 ग्राम पंचायतां मांय ग्राम सेवा सहकारी समितियां पंजीकृत हैं। मीटिंग मांय जिला कलेक्टर काश्तकारां सारू पर्याप्त खाद—बीज री पूर्ति तैय करण रा हुकम दीना।

000